

华阴县续志

一
函
六
册

華陰縣續志卷二

建置志

百里雷封古來侯制勢宜重威城須壯麗堂皇敷正庠序育才常平荒備社
倉利推河伯嶽公夷秩鮓祝孔孟首虔關岳同肅生多功德死享裸將不載
祀典用廢烝嘗爰有叢林雅關名勝任講道德或參上乘徒杠輿梁政治攸
關褰裳病去衣帶阻刪述建置志

目

城池

衙署

倉儲

學校

華陰縣續志卷二

建置志

城池

華陰城池本隋唐舊址土城周圍二里九分元至正十八年達魯花赤脫力白修築明嘉靖四十二年變遭覆隍知縣李冲漢重築睥睨砌以磚萬曆五年李令承科奉文增厚八尺高二丈二尺今二丈七尺池八尺深淺有差爲門三東曰蓮珠西曰金萼南曰迎陽各有高樓北無門三樓之建舊志謂縣令王九疇修歲久三樓頽圯至乾隆十五年知縣姚遠翹勸諭紳士募捐重修西曰翠靈中曰環翠東建尊經閣以當三峯城東門外池水其源來自黃神峪經城外東橋下北流折而西北隅注於西門外之長澗水南門外地形稍厚未能深鑿至道光十九年三樓漸傾圯縣令姜申璠仍勸諭募捐葺修同治元年髮逆入境焚毀南城門樓七年

縣令王兆慶補城浚池增西城礮樓二葺南門樓三楹光緒六年縣令徐一鶴重修東南隅之奎星樓及東西門樓二十年廿回蠢動制府檄各屬修治城垣藉資防守知縣梁承馨邀集紳耆勸諭募貲共募錢二萬一千餘緡乃設局督工規制悉仍其舊歷二年餘東西二城始告竣如南北城上之睥睨及鎮西環翠尊經三樓皆甫具規模資已告竭又值梁令升調卸任前功遂廢民國以來屢修屢止至十九年值歲飢縣長王作舟由糧攤款修治之並修城上鎮西樓因亂中止後復修理現樓已成

野史氏曰易之坎象曰王公設險以守其國城池者設險之一也邑雖蕞爾有官以守有民以衛非築城鑿池官何以守民何以衛乎是以民保於城城保在官一旦有警登陴控捍自免蹂躪田單即墨張許睢陽復國而扼賊皆城池以屏圍之也春秋重築城緣陵楚邱邢衛中興義有取爾宮以小惡之

故浹旬而失三城雖鄙陋之區猶難保况華陰爲孔道通衢同治年間之縣城不守官委而去其殷鑒也然有有形之城池尤有無形之城池孟子地利人和之論乃不易之言也守斯土者尙其留心於衆志之成以時修理永固金湯哉

衙署

縣署在城之中百年以前修築規制無從考稽維查乾隆十五年知縣姚遠翻以署大門甃爲磚洞上建樓房即登望之譙也二門三楹內立戒石坊大堂五楹堂下東西列置六房吏廨中通甬道前後左右共建房十餘楹爲諸役聽事舍二堂五楹前列偏房臧獲司鑰者居焉三堂制如前再後四堂爲官眷宅東西偏房爲書房爲幕室亦各四五楹三十二年知縣楊成棟三十九年知縣陸維垣先後重修至同治元年五年髮逆入城一炬幾盡八年知縣王兆慶十年知縣張國鈞亦

相繼繕修而規模悉仍其舊至民國十八年衆紳籌款重修磚洞上樓房十九年又於樓房東偏增修耳房三楹內懸大鐘藉警備

典史署在縣署西南大門外正堂後堂各三楹左右偏房共十餘楹署前即獄蓋所司牢狴也乾隆五十年典史張約重修同治八年典史陸履亨復修繼此雖間歲修葺而左右偏房減矣民國以來典史改名所官獄牢改名看守所十七年衆紳籌款修築所署正堂三楹所官居之下有偏房三楹庖厨役隸在焉獄牢亦同時修理廣狹仍舊而內容規模大加改良從前骯髒污穢之患悉除矣

戒碑樓在公堂前其文曰爾俸爾祿民膏民脂下民易虐上天難欺歷代立此以警官守民國二十一年頽廢

儒學署舊在縣治東教諭居明倫堂右大門向東正堂三楹南向西書房二楹堂後則眷宅也訓導居明倫堂左大門南向正堂三楹堂後眷宅處室學書門斗之

解三楹在明倫堂下甬道東隅

清聖祖訓
飭士子文

國家建立學校原以興行教化作育人才典至渥也朕臨馭以來
隆重師儒加意庠序近復慎簡學使釐剔弊端務期風教修明賢材蔚起庶
幾棧樸作人之意乃比來士習未端儒效罕著雖因內外臣工奉行未能盡
善亦由爾諸生積錮已久猝難改易之故也茲特親製訓言再加警飭爾諸
生其敬聽之從來學者先立品行次及文學學術事功源委有敍爾諸生幼
聞庭訓長列宮牆朝夕誦讀寧無講究必也躬修實踐砥礪廉隅敦孝順以
事親秉忠貞以立志窮經考義勿雜荒誕之談取友親師悉化僞盈之氣文
章歸於醇雅毋事浮華軌度式於規繩最防蕩軼子衿佻儻日昔所譏苟行
止有虧雖讀書何益若夫宅心弗淑行已多愆或蜚語流言脅制官長或隱
糧包訟出入公門或唆撥姦滑欺孤凌弱或招呼朋類結社要盟乃如之人

名教不容鄉黨不齒縱倖逃褫扑濫荷章縫返之於裏能無愧乎况乎鄉會
科名乃掄才大典關係尤鉅士子果有真才實學何患困不逢年顧乃標榜
虛名暗通聲氣夤緣詭遇罔顧身家又或改竄鄉貫希圖進取囂凌騰沸罔
利營私種種弊情深可痛恨且夫士子出身之始尤貴以正若茲厥初拜獻
便已作姦犯科則異時敗檢踰閑何所不至又安望其秉公持正爲國家宣
猶樹績應後先疏附之選哉朕用嘉惠爾等故不禁反復惓惓茲訓言頒到
爾等務共體朕心恪遵明訓一切痛加改省爭自濯磨積行勤學以圖上進
國家三年登造束帛弓旌不特爾身有榮即爾祖父以增光寵矣逢時得志
寧俟他求哉若仍視爲具文玩愒弗儆毀方躍冶暴棄自甘則是爾等冥頑
無知終不能率教也既負栽培復干咎戾王章具在朕亦不能爲爾等寬矣
自此以往內而國學外而直省鄉校凡學臣師長皆有司鐸之責者并宜傳

原书缺页

官食租衣稅輸納均脂膏之漬思勿暴取嚴禁蠹吏之舞文重懲惡役之磕詐斯不愧民之父母居是署而始無負也不然其如此衙署何戒碑在前屋漏在上尙其慎旃

學校

雲台書院在縣南距城七里自乾隆十六年知縣姚遠翹創修前後堂序共二十二楹光緒三年知縣鄭慶莊以院宇傾頽復拓舊址幾倍續修禮堂講堂各五楹門宇三楹前後齋廊十六楹六年知縣徐一鶴又增修至聖宮三楹其職員有山長一人齋長二人司事二人教授惟以舉業爲宗旨肄業者生童兩班數無定額三十二年知縣崔肇琳改設高等小學堂專注各門科學每年經費舊由於知縣姚遠翹捐廉置田四十四畝餘光緒三年知縣鄭慶莊稟請中丞譚公發金五百又得省退發里供驛價金三百六年知縣徐一鶴籌撥錢二千四百餘緒二十年

知縣梁承馨從里局差徭盈餘項下又撥錢二千緡每年收租及收息僅足敷用至民國十八年五月改爲製藥廠今學校移設縣城內城隍廟對宇即昔日義學舊址但規模較隘正在陸續修築以增式廓尙未完備

義學在邑城內東南隅嘉慶二十年知縣汪漣創建同治九年知縣張國鈞募捐重修大門講堂奎星閣各三楹東西院上房六楹客廳書舍齋室共三十楹光緒三十二年知縣崔肇琳改設縣立師範傳習所義學之名廢矣舊義學職員數倣雲臺書院改師範後主教二人管理員一人其經費原有學田城濠校場各地共七十餘畝街房二座官紳迭次捐錢千餘緡又里局差徭盈餘項下撥錢一千緡即以每年收入租息作爲學校基金至民國十九年邑之高等小學校由雲臺而移設於此

教育局自清末學官廢即設學務局旋改名勸學所民國十四年又改名教育局

地址在縣署東財神廟其中局長一人督學二人事務員三人分全縣爲四學區
每區教育委員一人分理區中教育縣局附設初級小學校教員一人肄業生四
五十名每年經費及各校津貼多取於舊日雲臺書院義學兩處貲產不足則由
財政局籌發民國二十年將縣局附設小校歸併高級小學校

縣立第一高級小學校自清末改建學制地址在舊日雲臺書院民國十七年馮
軍改爲製藥廠後移設縣內舊日義學故址設校長一人教員六人事務員一人
學生列甲乙丙三班數無定額教授悉按教部定章每年經費由縣教育局發給
縣立單級師範講習所現在城內馬王廟

縣立平民工廠在邑城內因無款停辦現仍籌款復辦地址在南街

私立高級小學校六一正誼學校在五方村一樂育學校在岳鎮南三清廟一三
成學校設邑西北文王村寺院一新民學校設邑東北三河口一開民學校設邑

西北焦鎮一羅山學校設於邑西之敷水鎮三成新民兩校停辦

以上六校每年由縣教育局照學生數目成績優劣酌津貼洋若干

初級小學共二百餘處每年經費鄉里自籌

縣立女子初級小學校在嶽鎮亭後堡設校長一人女教員二人學生五十餘名
分級教授經費由教育局發給

私立女子初級小學校共八處每女生由縣教育局年津貼洋二元現停止者甚
多

民衆學校共二十二處每校每年由縣教育局津貼洋三十元

社學義學暨四知書院太華書院仰華書院等所在地址及建立年月俱詳舊志
茲不復贅

財政局

建設局

公安局均在邑城內

倉儲

邑城內舊有三倉建於縣署東者曰東倉街西曰西倉街南曰南倉南西二倉久廢惟東倉即舊名常平倉也計儲額市斗四萬餘石惜近年饑饉頻遭積儲一空時有儲者軍麥而已義倉舊亦有二一在邑城東北鄉三陽里一在邑城西北鄉義合里今亦徒存其名而無其實矣

野史氏曰庶富之後教育宜加倉廩既足禮義斯興倉儲學校蓋有密切之關係政治之甚重要也所以子產不毀鄉校漢武振興太學皆得三代明倫之義焉無如士風日下青衿見刺挑達之習今尤甚昔孟子近於禽獸之言有餘慨耳竊望兵荒運挽深耕易耨講餘一餘三之法申之以孝弟之義將人人親親長長而天下平矣華陰雖徧小賢有司講求而提倡之則一邑具天下之象焉振民身於飽煖培士習爲敦龐安見蚩氓常困苦而選造不淳

厚耶

祠祀

文廟 在縣署東清康熙嘉慶間疊經修葺迨光緒三十一年知縣崔肇琳再加重修有記云舉世之不晦盲否塞者聖人之道千古常昭耳翼聖學以正人心則人心知響往崇聖教以敷治化則治化進文明學校之廢興其關於世道之盛衰蓋罔鮮矣基孝友植忠信沐之以禮義養之以廉恥使羣焉寢饋於道德之歸於是而邪慝之說不得以中之異端之術不得以汨之堅白異同之辨不敢申門戶町畦之見不敢逞其日茫然於維新守舊者皆譁張也其日紛然於自由平等者皆姦宄也嗚呼驚愚惑衆悖亂淪胥求所以扶名教翼綱常正大經立大法萬世無弊而爲久安長治之規者非賴有聖道以維持根本之地哉此學宮之設有繇來而重修於今日尤汲汲也况華陰爲關西首邑代有偉人

當此需材孔亟之時河嶽有靈其必誕生俊傑蔚爲國家重器馨香以祝之烏

可不樸槭以作之乎邑之學廟創自前明我朝康熙嘉慶間疊經修葺迄今百餘年矣歲戊戌汪君資生秉鐸來此睹楹垣之哆剝慮鐘鼓之飄搖怒焉於心爰籌伐枯柏以爲庀材之款稟請大府業已准行迺以歲不告豐時猶有待越五年癸卯前令劉君百泉適攝斯篆再稟重修萃紳耆而議有同心胥士民而功成集腋合五鎮二十八里度力樂捐共得五千金有奇量鼓齊操韓章競舉雖紳耆士庶之踴躍從事而汪君之力尤居多焉甲辰冬

下走

以散館外選於

此下車而後展謁維虔瞻殿宇之巍峨望宮牆之高峻躬逢其盛媿經始之未能樂觀厥成幸彌縫乎其闕對華峯而仰止尼山之壇坫如親俛渭水以溯洄洙泗之淵源若接况乎三頌肇人文之頌四知表品節之清無不懋風化之本原煥日新之德業以適於正直蕩平之治迥非曲局滅裂之學所得參自今以

原书缺页